

H

1617

153

3940

150 -

LES
LARMES DE
LA FRANCE, A
ses Enfans mutinez.

9

*Amamus qui prosunt, odimus
qui tedunt.*



A PARIS
M. D XVII.

LES
ARMES DE
LA FRANCE, A
les Enfans militaires.

Armées qui protègent, ordonnent
qui se battent.

ARMÉE
M. D. XVII.

LES LARMES DE la France.

SI on reputé la Vipere estre malheureuse de ce que le fruit qu'elle produit ne sort iamais de son ventre qu'en luy dechirât les entrailles, ne dois-je pas estimer aujour d'huy ma condition semblable à la sienne, moy qui apres vous auoir alaiétez comme vostre mere commune, ne reçois neantmoins de vous que tout sujet de plaincte & de douleur? N'estes-vous du tout denaturez d'aimer si peu vostre Patrie, qu'il semble que vous ne soyez neez que pour la desoler & pour en troublant continuellement son repos, attirer sur vos testes la hayne & les imprecations des gens de bien qui maudissent & detestét vos deportemens? Auez-vous à lamais vn cœur de roche, inflexible & inexorable à tant de gémissements & de cris lamentables, dont le pauvre peuple semble rompre le Ciel, pour vous esmouuoir à quelque compassion du mal que vous luy faictes iniustement souffrir, depuis que l'humour vous a pris de vous masquer le visage, & de violer l'obeissance que vous

deuez à vostre Roy sous le lustre & l'apparence d'une imaginaire reformation de l'Estat? Ne respirer que feu & flamme, ne mediter que rebellion, que reuolte, n'auoir pour objet que l'enuie & la jalousie de la prosperité d'autrui, & ne chercher en fin qu'une grandeur particuliere dans la ruine & diminution de tout vn public, est-ce ie vous prie la preue & la marque essentielle d'une vraye & non feinte reformation d'Estat? O Dieu, quels Reformateurs!

I'aurois à faire vn gros volume s'il me falloit entreprendre de depeindre icy yn chacun de vous selon les couleurs. Il me suffira de vous dire qu'il n'y a nul de vos Peres que s'il sortoit auourd'huy du tóbeau qui ne vous desauoast pour sien, & qui ne vous crachast au visage, comme d'autre-part vn HENRY I^{er} GRAND auroit iuste occasion de vous reprocher vostre ingratitude, y ayant tel d'entre vous qui seroit encores comme enseuely dans la foule, si la bonté de ce Prince ne l'eust agrady & esleué aux plus honorables charges de la couronne. Ingrat, boute feu, iusqu'à quand semerastu la discorde parmy tes compa-

triottes? Iusqu'à quand seras-tu reputé
 l'auteur & le promoteur de toutes leurs
 factions? Ne te sens-tu point l'ame bour-
 relée de la débauche ou tu as attiré Ce-
 luy qui fait maintenant penitence du
 peché dont tu luy as empoisonné les
 sens & l'entendement? Mais puis que
 vous ne faiëtes iamais que reboüillir
 vne mesme chose, quel autre sujet pou-
 vez-vous auoir de vous plaindre de l'in-
 iustice de la Reynemere du Roy, sinon
 de ce qu'elle a esté trop liberale en vo-
 stre endroit, & trop indulgente & misé-
 ricordieuse à vous souffrir impunément
 tout le mal que vous auez faiët par le
 passé? Car ceste sage Princesse s'est elle
 seulement contentee de vous pardon-
 ner vos crimes, & mesme de les recom-
 penser? Semble-il pas qu'elle ait encores
 voulu pour vous assouvir baiser les ver-
 ges dont vous auez tant & tant de fois
 batu son pauvre peuple? De quels biens,
 de quels honneurs ne vous a elle cōblez
 pour tâcher de vo^r obliger à seruir fidel-
 lement? Et pour tout cela en estes-vous
 deuenus meilleurs, en estes-vous plus
 obeïssans? Ie voy au contraire qu'il n'y
 à nulle tenuë en vous, & que tout vo-

stre faict n'est qu'une vraye toile de Penelope ou il y a toujours à recommencer.

Les Atheniens sçauoient le bien & ils ne le faisoient pas. Vous dites merueilles, & vous emplissez la bouche de ceste specieuse protestation, que vous estes tres-humbles seruiteurs du Roy: Mais le reuers de vostre medaille porte que l'entente est au diseur. Vous aimez le Roy (dites-vous): mais d'embrasser les resolutions de son Conseil, ny d'adhérer à ses Ministres, c'est là où vous hecitez, c'est là où vous cherchez sujet de noie comme si vous ne vouliez qu'un Roy des échets, un Roy en peinture qui n'agit ny ne se remuast non plus qu'un simple tableau. Or par quels organes voulez vous qu'un grand Monarque regisse son Estat, que par le ministère des seruiteurs qu'il establir sous son auctorité, & lesquels quoy que vous vous imaginiez, n'ont mouuement que celui qu'ils empruntent du seul Chef? Vaine & frivole est donc la plainte que vous rebattez à tout propos pour éblouir les yeux des plus credules, disans qu'il y a aujourdhuy un Seigneur d'as le Royaume qui gouverne tout, qui dispose de tout à sa fantaisie.

WILSON
Uon

I'ose croire qu'il ny à point de langue mercenaire ny de plume à louage pour plaider & soustenir sa cause: Si est-ce que ie ne feindray point de vous dire que c'est chose trop iniuste, que de vouloir reserrer le pouuoir des Princes souuerains dans des limites si estroictes qu'il ne leur soit loisible de gratifier tels de leurs subiects que bon leur semble, ny ayant, ie ne dy pas vn de vous: mais le moindre gentilhomme qui voulust voir sa liberré si controllee qu'il ne peust faire du bien à vn des siens s'il l'affectionne. Pourtant ne pensez-plus befler le monde par vn pretexte si peu fauorable, & dont l'artifice est si découuert, qu'en le remettant sur le tapis c'est encherir toujours plus sur le blasme que les enfants mesmes vous en donnent. On le fait grand (dites-vous) on l'establit dans vne prouince, il s'aquier des amis, il s'oblige des seruiteurs. Et quoy, auez-vous la veuë si foible, qu'estans néz d'vne qualité si releuee, vous ne puissiez soustenir l'esclat de la fortune d'vn particulier? L'enuie ou la jalousie de sa felicité peut-elle tomber en des ames si fortes que les vostres? Faut-il pour cela

murmurer contre vostre Maistre, faut-il décrier par des libelles le regime & le gouvernement de l'Estat? Que sçauuez-vous si tout estranger qu'il est, il ne vous surmontera point en affection au bien du seruice du Roy; & s'il ne donnera point de si bons gages de sa fidelité, qu'elle fera honte à la desloyauté de certains François, dont on ne sçait qu'elle assurance prendre, tant ils ont l'esprit volage & inconstant, nul lien, nul bienfait, nul respect ne les pouuant attacher à leur deuoir?

Ceste fortune qui vous donne ainsi dans les yeux, n'estant pas incompatible avec la paix & le repos du Royaume, souffrez-la plustost que d'engager vostre Patrie en vne guerre sanglante, où en cuidant chercher la ruine d'autrui vous y trouuerez infalliblement la vostre. Qu'on le comble de tant de faueurs qu'on voudra, qu'a cela de proportion avec les rauages qu'un mouuement de trois mois entraine apres soy? En auez-vous pas desia fait taster du fruit? Est-ce la fortune qui cause le retranchement des pensions? Est-ce pas plustost la nécessité où vos confusions ont réduit toutes

tes choses, suivant la maxime de vostre grand Politique qui vous a appris en vous catechisant, que pour auoir meilleur marché du Prince il faut commencer par la ruine de son peuple? Est-ce sa fortune qui a causé la dépense de dix-huit millions pour les frais de vostre dernière guerre, sans y comprendre la desolatiō de trois ou quatre prouinces? A quoy nuist en fin ceste fortune que vous agacez sans cesse, plustost par mal talent & par enuie que pour autre respect, n'y ayant nul de vous qui tout grād qu'il est ne voulust encores engloutir s'il pouuoit ceste fortune avec la sienne? S'il à des places dans le Royaume, ie ny voy que des François establis pour les commander en son absence. S'il départ du bien qu'on luy fait, ie voy qu'il ny à que la Noblesse françoise qui l'accompagne qui en tire la meilleure portion. Et s'il n'apporte à la jouyssance de sa fortune tout le temperammēt que vous y sçauriez desirer, qui est-ce qui y perdra plus que luy mesme? O que la passion est vne mauuaise conseillere!

La pitié va tousiours croissāt en ce que non contens de décrier le Souuerain, en la personne d'un seruiteur qu'il affe-

tionne, & lequel vous auez mesme autrefois tous recherché d'amitié pour vous en preualoir, vous tâchez encores de rendre odieux les Ministres qui seruent aujourd'huy l'Estat, & parlez deux comme s'ils estoient creatures & Emis-saires de celuy à qui vous attribuez la disposition de tout, comme si luy seul pouuoit établir & destituer qui bon luy semble: Mais si la fable raconte que la Lune demandant vn iour qu'on luy fist vne robe, sa mere luy dist qu'elle ne sçauoit bonnement qu'elle mesure luy faire prendre, par ce que croissant & décroissant comme elle fait, elle estoit tantost grande, tantost petite: Je pourrois dire de mesme, que ie ne sçay qu'elle creance donner à vostre langage tant i'y voy de varieté, loüans & regrettans aujourd'huy les anciens Ministres de l'Estat que vous auez tant vesperisez par le passé. Je ne doute point toutefois que vostre loüange ne leur soit si suspecte qu'ils ne vous peussent iustement faire la mesme demande que fist cét Orateur, qui sçachant que sa harangue auoit esté agreable au peuple, duquel il cognoissoit l'humeur inconstante, demanda *sil luy estoit point par hazard eschapé de dir*

quelque chose de mauvais: Mais n'estendant ce discours à vne plus grande iustification des actions de ces dignes Personnages-là, j'ose croire que dedans le repos qu'ils se donnent de leurs longs & fidelles trauaux, ils detestent eux mesmes le sujet de mescontentement que vostre desobeïssance cause à leurs Majestez.

Je vous demanderay seulement ce que vous pouuez alleguer de iuste & de pertinent au desaduantage de ces autres Messieurs, qui remplissent maintenant leur place? Car pour celuy qui tient les Sceaux, nul de vous ne peut pas ignorer que ce ne soit vn Magistrat qui s'est toujours rendu venerable par la grande reputation de sa legalité, le feu Roy d'immortelle memoire l'ayant bien reconnu tel, & pour ce respect l'a souuēt employé aux charges & commissions, où l'equité d'un iuge incorruptible estoit necessaire. Et depuis qu'il est monté au suprême degré d'honneur où la recognoissance de son merite, & de sa capacité la appelé, exerce-il pas la Iustice avec tant de loüange & d'aprobation qu'il ne peut estre blasmé ny hay que de ceux qui ont besoin de cire verte, & à qui les mem-

bres tremblent deuant le Tribunal où il est assis? Quant au Personnage qui a vostre aduis, comme Secrétaire d'Estat tient la main du Roy, son extraction tirée d'un sang noble & illustre, suivie d'une nourriture si accomplie en toute sorte de vertus, que sa SAINCTETE admirant dans Rome la maturité du fruit de son esprit auant la saison, le cōsacra à l'Autel, & luy donna dispense de laage requise par les Canons pour paruenir à la Prelature: cela dy-je ne vous deuroit-il pas estre vn sensible argumēt pour vous faire conceuoir vne bonne opiniō de sa suffisance, de sa preud'homme, & qu'auyāt l'entēdemēt susceptible de toute honorable fonctiō il se peut tres-dignement aquitter de la charge où il est maintenāt employé? Pour le troisieme qui veille à l'administration des Finances, à r'il les mains moins nettes que les deux autres n'ont la conscience? S'y comporte r'il moins innocemment que ne faisoit son predecesseur? A r'il reputation de concussionnaire qui écorche le peuple par l'inuention de nouueaux tributs & imposts? N'est il pas au contraire recogneu viure en ceste candeur & integrité, que n'oprimant le public, il n'a pour obiet

de tout auancemēt de fortune particulière, que le dessein de voir fleurir & prosperer les affaires du Roy à l'honneur & glorieuse conseruation de son Estat? Estās tous trois tels que ie les des-cry, que sçauriez vous trouuer à redire à l'ellection que leurs Majestez en ont faite, si ce n'est que vous vouldriez peut estre qu'on remist à vostre discretion de choisir des hommes qui tinsent le Sceau, la main & la bourse du Roy? Dieu sçait si tout en iroit mieux!

C'est ainsi que des fidelles subiets de-uroiēt parler reuerenamēt des ministres de l'Estat sous lequel ils ont à viure, y estāt obligez, & pour la verité de la chose, & pour la reputation de leur Prince. Aussi n'y à t'il legitime gouuernement que celuy qui s'exerce sous l'autorité du Souuerain, lequel a toute puissance d'establi & de demettre telles persōnes que bō luy semble, & lesquelles ses subiets doivent accepter sans chagrin ny murmure quelconque. Si vous meditez quelque fois cela en vostre esprit, vous ne vous arresteriez pas à des pretextes si foibles que sont ceux que vous empruntez pour colorer vos mouuemēs. Vous cōsiderez que tout ainsi que les gran-

des cōflagrations des villes ne commencent pas le plus souuent par les Temples & autres edifices publics : mais bien par vne petite estincelle couuee en la maison d'un particulier : Ainsi la ruine & desolatiō des estats arriue quelquefois autāt par des rancunes, par des enuies & des jalousies priuees que par vne guerre ouverte entre des Roys égaux en force & en puissance.

Quel blasme vous dōneroit la posterité si elle vous chargeoit de ceste hōteuse reproche, d'auoir esté cause par vos riotes & diuisions de la subuersiō de ceste Monarchie, la splendeur de laquelle vous fait estre ce que vous estes, & laquelle n'estant plus, vous ne seriez rien du tout, par ce que mesmes les pieces que vous emporteriez de ce débris ne seroit qu'une proye apprestee à un plus puissant cōquerant que vous n'estes tous ensemble, tant les peuples aimeroiēt tousiours mieux respirer sous l'empire d'un Monarque qui les pourroit puisāment protéger, que nō point de se voir asservis sous iniuste & violente dominatiō de gens foibles, qui ne pourroient subsister, ny se soustenir de leur propre poids.

Vn ancien disoit que les peuples de

l'Asie ne valoiēt rien pour hōmes libres, mais qu'ils estoient bons esclaves : Le mesme ne peut-t'on pas dire des François qui estant nēz en liberré, se sont accoustumez à viure sous la douceur de la Royauté. Fy, fy donc de l'Anarchie & de toute autre forme d'Estat, que sous l'obeissance d'un seul chef, hors l'unité duquel tout le reste n'est que tumulte & confusion. *Commēce premierement d'establir cēt ordre en ta maison, & on verra comme tu t'en trouueras*, respondit Licurgue à vn factieux, qui au preiudice de l'authorité royalle vouloit introduire la Democratie en Lacedemone. Vains seront donc vos efforts à renuerser les trōne de nos Roys. Ce n'est pas que ie ne croye que toute iniuste qu'est vostre querelle, vous ne faciez neantmoins beaucoup de mal pour vn peu de temps. Vous pillerez, vous rançonnerez, vous arracherez le pain des mains de la vefue & de l'orphelin. Vn viue le Roy sans vous mettre en queuē sera reputé à crime au marchand, au laboureur, pour en les declarant prisonniers de guerre, les martiriser & leur faire sentir toute sorte de cruauté & de mauuais traitement : Mais souuenez-vous que ne tirant teston qui ne soit bai-

gné dās leurs larmes, Dieu qui a l'œil de la diuine prouidence ouuert à la cōseruatiō de ce Royaume, armera le bras du Roy d'une force si redoutable qu'il foudroyera tout ce que vous projetterez dans vos conseils pour troubler son repos, en agitant le vostre propre, la ruine de vos maisons & de vos fortunes, avec la syndereſe d'une conſcience cauteriſce vous eſtant en perpetuel ſuplice.

C'eſt en ceſte occaſiō (ô Prince genereux!) que tous les bons François jettēt les yeux ſur toy comme ſur celuy qui commandant les armes de ton Roy, es à vanger l'iniure dōt ſes ſubiets rebelles prouoquent ſon couroux. Va donc accōpagné du bon Genye de la France, & n'aye pour eſguillon qui t'excite & anime à bien faire, que la memoire glorieuſe de ſes faits belliqueux de tes Ayeulx, leſquels à l'effuſion de leur ſang ont tāt de fois garanty cet Eſtat, & de l'inuaſion de l'eſtranger, & de l'embrazemēt de ſes mauuais Citoyens: Va dy-ie puis que tu ne leur cedas en valeur ny en fidelité, & face le Ciel qu'à ton retour tu entres dans Paris victorieux & triomphant.

Fiat iuſtitia, & pereat mundus.

F I N.